


Oz è il Di da la scrittira da Braille



SCHANER

Il Di da la scrittira da Braille

Cura has ti anniversari? Sas ti gia leger la data da tes anniversari? In anniversari impurtant per fitg blers umans che na san betg leger cun ils egl è l'anniversari da Louis Braille. El è naschì ils 4 da schaner 1809. Pervi dad el è quai il Di da la scrittira da Braille, la scrittira per persunas tschorvas. Louis Braille aveva mo quatter onns, cura ch'el è sez daventà tschorv. Cun far termagls u zambre-giar cun in guaffen en il lavuratori da seller da ses bab è el sa glischnà or e sa furà en in egl. Quel egl è s'inflamà, pauc pli tard era l'auter, ed el è daventà tschorv. Cura che Louis Braille ha pudì ir a la scola per persunas tschorvas a Paris, n'è el betg stà cuntent cun la scrittira ch'el

aveva dad emprender là e perquai ha el inventà sez ina scrittira. El ha sviluppà vinavant ina scrittira cun dudesch puncts ch'ins duvrava en l'armada franzosa. Durant las vacanzas da stad, en il lavuratori da ses bab, ha el chattà or ina scrittira cun sis puncts per palpar. Tut tenor co ch'els puncts èn ordinads signifitgan els differents bustabs u differentas cifras. Cun mo 15 onns ha Louis Braille inventà questa scrittira che vegn duvrada oz dad uffants e creschids tschorvs sin tut il mund. Grazia ad el pon er els leger – cun la detta empè cun ils egl.

Enconuschas ti ina persuna ch'è tschorva?

Co sa ina tschorva chaminar senza crudar?

Co sa in tschorv s'orientar?

Co san persunas tschorvas leger?

Nua has ti gia vis la scrittira da Braille?



Tge bustab èsi?

Gieu per cumenzar

Tut ils uffants sesan en in rudè e seran ils egl. In uffant survegn ina chaussa da palpar che sa chatta en in satget da taila. El palpa la chaussa senza commentar e dat vinavant il satget al proxim uffant. Suentar mintga runda ston ils uffants engiavinar tge chaussa ch'els han palpà. P. ex: socca, crap, grattadaira, dat, balla da tennis, squitta, cudesch, etui, euv.



Mintga uffant survegn ina stgatla dad ovs, sis ballas da pingpong ed in fegl cun l'alfabet da Braille.


- 1 Mintga uffant furma ina giada cun las ballas il bustab A.
- 2 Ussa furma mintga uffant cun las ballas l'emprim bustab da ses num.

Ed uss en dus:


- 1 In uffant va davent, l'auter uffant furma in bustab e cuvra el cun ina cuverta u in sientamauns.
- 2 Il segund uffant palpa – senza guardar – las ballas. L'uffant dastga guardar sin il fegl cun l'alfabet e dir da tge bustab ch'i sa tracta. Èsi il dretg?
- 3 Lura pon ils uffants midar las rollas.




L'alfabet da Braille



A B C D E F G H I J




K L M N O P Q R S T



U V W X Y Z

Las cifras da Braille




1

2

3

4

5



6

7

8

9

0